

平陽府志卷之二十八

寓賢

擇地而蹈士君子之常也然而高踪所留地增重焉平
陽地號佳勝四方名賢多有至者始或游歷偶到久且
栖遲以終歷考芳躅深用嚮往噫人之生於斯長於斯
聚族於斯者林林總總矣而係人寤思乃在僑寓之士
然則人能重地豈不以德哉作寓賢志

周

蘧罷

字子蕩楚大夫靈王二十五年如晉蒞盟平公享
之將出賦既醉叔向曰蘧氏之有後於楚國也宜

哉承君命不忘敏子蕩將知政矣敏以事君必其養民政其焉往

季孫行父

魯大夫襄靈時兩使於晉後復使如晉魯宣伯使譖於卻犇請殺之晉執之舍於茗邱成

公使子叔聲伯請於晉犇不許范文子曰季孫於魯相二公矣妾不衣帛馬不食粟可不謂忠乎子叔嬰齊奉君命無私謀國家不貳圖其身不忘其君信讒慝而棄忠良若諸侯何乃許魯平赦行父歸

公孫歸父

字子家魯大夫欲去三桓以張公室與宣公謀而聘於晉欲以晉人去之公薨還及笙壇

惟復命於介既復命袒括髮
即位哭三踊而出遂奔齊

晏嬰

齊大夫靈王十九年晉人執衛侯嬰相齊侯如晉私與叔向曰晉君宣其明德於諸侯恤其患而補

其闕正其違而治其煩所以爲盟主也今爲臣執主若之何叔向以告晉人歸衛侯景王六年齊侯復使嬰請繼室於晉平公許之即成昏受禮叔向從之宴相與語齊晉之敝嬰曰此季世也吾弗知齊其爲陳氏矣因言

公棄其民而歸於陳氏之故叔向亦以晉公室之衰告之後胥如其言

公孫僑

字子產一字子美鄭大夫靈王二十三年晉徵朝於鄭鄭使僑於晉對之又三年鄭伐陳使僑

獻捷於晉晉人問陳之罪僑對甚辯晉人不能詰乃受其獻景王二年相鄭伯如晉晉侯以魯喪未見僑使盡壞其館之垣士文伯讓之僑以盜賊公行賓見無時對趙武聞之曰是吾罪也使文伯謝之平公見鄭伯有加禮厚其宴好而歸之叔向曰辭之不可已也如是夫子產有辭諸侯賴之若之何其釋辭也明年平公有疾鄭使僑聘晉且問之時卜人言實沈臺駘爲祟史莫之知叔向以問僑僑曰昔高辛氏有二子伯曰閼伯季曰實沈居於曠林不相能也日尋干戈以相征討后帝不臧遷閼伯於商丘主辰商人是因故辰爲商星遷實沈於大夏主參唐人是因以服事夏商其季世曰唐叔虞當武王邑姜方娠太叔夢帝謂已余命而子曰虞將與之唐屬諸參而蕃育其子孫及生有文在其手曰虞遂以命之及成王滅唐而封太叔焉故參爲晉星由是觀之

則實沈參神也昔金天氏有裔子曰昧爲元冥師生允格臺駘能業其官宣汾洮障大澤以處太原帝用嘉之封諸汾川沈姒蓐黃實守其祀今晉主汾而臧之矣由是觀之則臺駘汾神也抑此二者不及公身若公身則亦飲食哀樂之事也僑聞之君子有四時朝以聽政晝以訪問夕以修令夜以安身於是乎節宣其氣勿使有所壅閉湫底以露其體茲心不爽而昏亂百度今無乃壹之則生疾矣僑又聞之內官不及同姓故志曰買妾不知其姓則卜之違此二者古之所慎也男女辨姓禮之大司也今公內實有四姬焉其無乃是也乎若由是二者弗可爲也已四姬有省猶可無則必生疾矣叔向稱善公聞之曰博物君子也重賄之十年復聘於晉時昭公有疾夢黃熊入於寢門韓起逆客問焉僑曰昔堯殛鯀於羽山其神化爲黃熊以入於羽淵實爲夏郊三代祀之晉爲盟主其或者未之祀也乎起祀夏郊晉侯有間賜僑以莒之二方鼎先是公賜州田於公孫段至是僑爲其子豐施歸之於起僑教聘晉與叔向善叔向嘗問鄭政與其大夫僑對之後皆如其言及鄭鑄刑書

叔向貽書諫之僑復書曰吾以救世也既不承命敢忘大惠其獻陳捷於晉也孔子嘗稱之曰志有之言以足志文以足言不言誰知其志言之無文行之不遠晉爲伯鄭入陳非言辭不爲功慎辭哉

游吉

鄭大夫靈王二十七年如晉告朝楚少姜之葬暨虬祁成成至晉送賀敬王二年相鄭伯如晉見范

獻子獻子以王室問對曰老夫其國家不能恤敢及王室抑人亦有言曰蔑不恤其緯而憂宗周之隕爲將及焉今王室實蠢蠢焉吾小國懼矣然大國之憂也吾儕何知焉吾子其早圖之獻子懼而與宣子圖之乃徵會於諸侯四年夏遂會於黃父令輪王栗具成人曰明年將納王趙簡子見吉問揖讓周旋之禮焉對曰是儀也非禮也夫禮天之經也地之義也民之行也天地之經而民是則之故能曲直以赴於禮者謂之成人簡子曰鞅也請終身守此言也頃公之葬鄭復使吉吊且送葬士景伯詰其無貳之故吉對以禮有豐省晉不能詰十四年返自召陵吉未至而卒簡子爲之臨甚哀曰黃父之會夫子語我九言曰無始亂無怙富無恃寵無違同

無敖禮無驕能無復怒
無謀非德無犯非義

季札

吳公子景王元年歷聘諸國適晉說趙文子韓宣子魏獻子曰晉國其萃於三族乎說叔向將行曰

吾子勉之公後而多良大夫皆富政將在家吾子好直必思自免於難

叔弓

魯大夫景王五年如晉平公使郊勞辭曰寡君使弓來繼舊好固曰女無敢爲賓徹命於執事敝邑

弘矣敢辱郊使請辭致館辭曰寡君命下臣來繼舊好好合使成臣之祿也敢辱大館叔向曰子叔子知禮哉忠信禮之器也卑讓禮之宗也辭不忘國忠信也先國後已卑讓也詩曰敬慎威儀以近有德夫子近德矣十

一年復如

晉賀廐祁

叔孫豹

魯大夫厲平之世凡五使於晉賦詩應對咸適事宜晉人稱之范宣子嘗問不朽於豹以范氏

先世爲言豹曰此謂世祿非不朽也豹聞之太上有立德其次有立功其次有立言雖久不廢此之謂不朽若

夫保姓受氏以守宗祊世不絕祀無國無之祿之大者不可謂不朽

子貢

衛人齊田常欲伐魯子貢請行孔子許之遂行至齊說田常伐吳田常許之使子貢南見吳王說使

救魯伐齊吳以越爲憂子貢請東見越王王令出兵以從還報吳王於是吳王乃遂發九郡兵伐齊子貢由吳之晉謂晉君曰臣聞之慮不先定不可以應卒兵不先辨不可以勝敵今夫齊與吳將戰彼戰而不勝越亂之必矣與齊戰而勝必以其兵臨晉晉君大恐曰爲之奈何子貢曰修兵休卒以待之晉君許諾子貢去而吳王勝齊於艾陵以兵臨晉晉人擊之吳師敗越遂襲吳

隰叔

周杜伯子宣王殺杜伯隰叔奔晉生士薦爲獻公司徒其後世爲晉卿

樗里子

名疾秦惠王之弟也滑稽多智號智囊惠王八年將而伐曲沃盡出其人取其城池二十五年

爲將伐趙虜趙將軍莊豹拔藺武王立爲右丞相昭王元年將而伐蒲蒲守請胡衍說樗里子勿攻樗里子善

之遂解蒲而去還擊皮氏
皮氏未降又去七年卒

豫讓

晉畢陽之孫欲爲其主智伯報所讐趙襄子常匿
入其宮廁刺之不克已復變音容爲乞人伏橋下
以伺又不克因請得襄子衣拔劍三躍擊之竟伏劍而
死是時襄子居趙城所伏橋卽今豫讓橋在城南

晉

諸葛誕

孔明族弟顯名於魏遊於浮山縣北七里愛其
山水明秀樓名不返子孫占籍代有文士其地

名諸

葛村

庾珉

鄆陵人性淳和好學行已忠恕少歷散騎常侍封
男爵懷帝蒙塵於平陽珉從之不勝悲憤因大號
哭賊惡之遇害元末謚曰貞王雋仕晉與珉同死懷帝
之難於平陽

辛勉

狄道人傳學有貞操隨懷帝至平陽劉聰將署爲
光祿大夫勉固辭以藥酒逼之勉曰大丈夫豈肯

虧節以事二姓引藥將飲左右止之聰嘉其節築室平陽西山月致酒米勉亦不受弟賓隨愍帝蒙塵平陽遇害

翹允

金城人從愍帝至平陽見帝被辱伏號於地不能起乃發憤自殺聰嘉其忠烈塋之

劉毅

東萊人孝而有節居平陽太守杜恕請爲功曹時語曰但聞劉功曹不聞杜府君晉武時累官尚書

僕射子勳正直有

父風官至左丞

北魏

酈惔

字幼渠范陽涿鹿人範弟神虎子也好學有文才尤長吏幹正光中刺史裴延儁舉秀才射策高第

後延儁爲行臺尚書引爲行臺郎以招撫有稱及延儁解還行臺長孫稚又引爲行臺郎加征虜將軍惔頗兼武用常以功名自許每進計於稚多見納用以功賞魏昌縣開國子後與唐州刺史崔元珍固守平陽武泰中

爾朱榮稱兵赴洛憚與元珍不從其命爲榮行臺郎中
樊子鵠所攻城陷被害時年三十六世咸痛惜之所作
文章行
於世

北周

宇文慶

字神慶河南洛陽人累授驃騎大將軍建德五
年從伐齊拔晉州其後齊師大至慶與宇文憲
輕騎而覘卒與賊遇爲所窘憲挺身遁慶退據汾橋衆
賊爭進慶引弓射之所中人馬必倒賊乃少却及破齊
拔高壁克并州功並居最詔封汝南郡公開皇初拜武
衛將軍上柱國涼州總管卒

唐

姜寶誼

秦州上邽人大業末鷹揚郎將領府兵從高祖
督盜太原及起兵授左統軍下西河霍邑武德
初封永安縣公歷右武衛大將軍劉武周數遣黃子英
盜雀鼠谷命寶誼擊之遇伏被執尋亡歸與裴寂拒宋

金剛戰汾州寂走寶誼復爲所擒上聞曰彼烈士必不肯下賊死矣賜其家物千段米三百斛果謀還被害且死西向大呼曰臣無狀負陛下賊平詔迎其柩贈左衛大將軍謚曰剛

姜暮

上邽人從唐高祖平霍邑絳郡上言多見嘉納後爲叅軍民畏其法而懷其仁比去位隱於霍之石

鼻谷

孫思邈

京兆華原人幼時洛川總管獨孤信見而異之曰此聖童也顧器大難爲用爾及長隱居太田

山學道養氣求度世之術曉天文精究醫藥著千金方脈經等書隋文帝以國子博士召不拜密語人曰後五十年有聖人出吾且助之因遊行醫寄跡洪洞城南二里坂上唐太宗與尉遲敬德戰敗晝夜被追三百餘里以勞成疾吐血不止思邈藥之而愈欲官之不受封爲安樂真人顯慶中召請京師年已老而視聽聰瞭拜諫議大夫固辭還山高宗賜良馬假鄱陽公主邑居之孟說盧照隣等皆師事焉照隣有惡疾思邈委曲諭曉有

心欲小膽欲大智欲圓行欲方等語魏徵等修齊梁周
隋等史屢諮遺事故其傳最詳孫處約常以三子見思
邈視之曰俊蚤顯侑晚貴佺禍在執兵其後皆驗太子
詹事盧齊卿之少也思邈謂之曰君後五十年當位方
伯吾孫爲屬吏願自愛時思邈之孫溥尚未生也及溥
爲蕭縣丞而齊卿爲徐州刺史永寧初年卒年百歲餘
洪洞人立廟於坂祀之呼曰安樂君廟至今千有餘年
邑人享祀不輟邑南三十里孫長村有墓存焉病者祈
藥卽愈朱子小學註謂思邈爲唐名進士以通醫目爲
技流惜哉

員半千

字榮期齊州全節人其先本彭城劉氏十世祖
凝之事宋起部郎及齊受禪奔元魏以忠烈自

比伍員因自姓員半千始名餘慶羈州通書史客晉州
州舉童子房元齡異之對詔高第已能講易老子長事
王義方以邁秀見賞義方嘗曰五百歲一賢者生子宜
當之因改今名凡舉八科皆中咸亨中上書自陳臣家
貧不滿千錢有田三十畝粟五十石聞陛下封神岳舉
豪英故鬻錢走京師朝廷九品無葭莩親行年三十懷

志潔操未蒙一官不能陳力歸報天子陛下何惜玉陛
方寸地不使臣披露肝膽乎俄舉岳牧對策擢高第使
吐蕃將行武后曰久聞爾名謂爲古人乃在朝邪境外
事不足行宜留待制卽詔入閣供奉爲弘文館直學士
又待制顯福門下累封平原郡公半千事五君有清白
節年老不衰樂山水自放開元九年遊堯山沮水間愛
其地遂定居卒年
九十四卽葬焉

褚無量

字弘度杭州鹽官人精禮及司馬史記擢明經
除左散騎常侍兼國子祭酒開元五年東巡狩

上疏請所過名山大川卽陵墳衍古帝王賢臣在祀典
者並詔致祭上納之卽詔無量祀堯平陽在所刺史參
獻七年卒贈

禮部尚書

李拯

字昌時隴西人咸通中進士累佐府幕黃巢亂避
地平陽後爲考功郎中知制誥時襄王煚之難拯

嘗退朝望南山而吟吟已涕下襄王敗拯爲亂兵所殺
妻盧氏刀斷一臂死

李餘福

京兆人叅政昭德之孫爲唐監察御史適丁唐末致仕閒居昭宗乾寧四年挈家東行至晉地

越陵山東紫胡口詢其地父老云東南曰翼城唐叔始封之都也西北曰壽城鄭太子分封之域也餘福遂卜

地焉其後元弼明經

中選知曲沃縣事

楊宗

雁門人唐昭宗天祐中仕至大司空以唐末兵起遂卜地於翼石鄭莊其後子孫楊璘輩累代貴顯

續贊

雁門人唐儀鳳中以勞調州倅遂家於翼續榮續世安續旻皆其苗裔也

元

張從諫

浙江寧波人元學士元亡遂遠遁佯狂乞於翼市後以詩贈學諭學諭憫其寒令諸生遺之以

布從諫曰何相輕如此古之却衣而斃者何人哉遂索詩及其布卒葬漏澤園

曹之謙

應州人興定中進士著名金元間寓平陽三十載講明道學爲斯文格式遠近多來從遊所著

有兌齋文集行世二子叔
舉季行皆克世其家學

李炳奎

山東堂邑人至正戊子進士官翰林國史院編修元末避兵於翼元亡遂卜居焉洪武三年縣

丞薛大昉延教
生徒以傳其學

孔思用

舊志按聖門志孔子流裔二十九支一在山西平陽府翼城縣係五十四代孔思用之後思用

字行道元至正間授沁水教諭陞威州學正因母袁氏病不赴母故卜葬於翼之浮圖村遂世居於是今有聖廟在焉春秋二祭
代有奉祀生員

明

毛士龍

字伯高宜興人萬曆四十一年進士爲刑科給事中內豎劉朝田詔劉進忠盜宮中貲下獄魏

忠賢傳旨貸死下刑科士龍抄叅者三忠賢及諸奄街刺骨忠賢憾張后誣爲死囚孫二所出土龍請究治妖

言并主使忠賢益怒士龍劾順天府丞邵輔忠輔忠反
劾之因削籍忠賢又令私人張訥劾之遣戍平陽衛士
龍知忠賢必殺已夜中穴墻遁其妾不知謂有司殺之
披髮號泣於道而忠賢適誅朝士爲士龍稱冤詔赦罪
復官晉左僉都御史病歸

羅人文

沁水諸生工岐黃術避寇僦居於翼崇禎丙子
薦賢書康熙初年授吉州學正今入籍

國朝

顧炎武

江南崑山人初名絳字亭林因易名並易其字
曰寧人爲學根柢考亭旁及天文地理律曆河

渠莫不考究與客語輒悉其本末常讀書曲沃韓村宜
園著有鄉國天下利病書日知錄下學指南音統音學
五書錢糧
論諸篇

平陽府志卷之二十九

風俗

漢應劭作風俗通義謂風俗不同聖人作而均齊之咸歸於正否則還其本俗夫本俗之貞淫正變亦極不齊矣惟唐儉魏思咏於詩雜見於紀傳遷史以爲堯舜之地風教固殊則又非五方之可概論者也守土以來按部巡行頗覘大畧間有或失則嗇或失則褊如昔人所譏者而勤儉深思之本意雖千古如一日於以知天氣地形水泉草木之性含血之倫因風成俗風俗固可易